



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 10

New Zealand nung Covid-19  
Lockdown atsulangshir

Alexander Zverev-i  
Cincinnati Masters kokogo

VOL. XVIII NO. 311 (ADOK 311) DIMAPUR SANGTENNÜ (TUESDAY)

LUROI (AUGUST) 24, 2021

₹ 5.00

## Governor Ravi-i Dr. Imkongliba Ao nem tetushi agütsü



Nagaland Governor R.N Ravi-i Dr. Imkongliba Ao nem tetushi agütsüba noksa nung angur.

**Dimapur, August 23, 2021**

**(TYO):** Nagaland state tentetsang Dr. Imkongliba Ao-i pa taküm bendanga agütsüba sülen August 24, 2021 nü küm 62 ajunger aser iba anogomung tenüng nung Nagaland Governor R.N Ravi-i pa nem tetushi agütsü.

"Dr. Imkongliba Ao ji tasütait aser tarutsü atema bilemba lennir ka liasü. Naga nunger mepetmesü tia nung aliba nungi pai Naga nunger kibong ka ama longjemdaksü aser India nung 16 buba state asütsü atema Nagaland kümtet" ta Governor Ravi-i sangdong ka nung ashi.

Dr. Imkongliba-i Naga nunger maitsü aser taginübatem kümzüka yua linük temzüng nung telatetba balaka kar yanglu aser Naga nunger tarutsü atema tamendakdak takang yanglutsü" ta paisa metetdaksü.

Iba anogomung nung Dr. Imkongliba Ao-i aginüba ama Nagaland yangertsü atema tenangzüka agidi. Lanurtemi asoshi tetsübu mesüra tenokdangba kecha maliba tepela aser azükaru aliba aser renoktsü asoshi maongka aika aliba state ka yangerdi" ta Governor Ravi-isa ayongzüük.

## DALT-i NFHRCC pusema nungiter

**Dimapur, August 23, 2021**

**(TYO):** NFHRCC-i Nagaland sorkar dang anogo 30 tsüingda foot hill road atema telangzüba agütsütsü mapang atakzüksüba pusema nungiter ta Dimapur Ao Lanur Telongjem (DALT)-i metetdaksüogo.

NFHRCC tentetba sülen nungi onoki o aser mapa agi iba mapa nungita arur. NFHRCC-i tekaratiba nung gari senzütetsüsa lenmang yanglutsü takhangba agütsüba sülen joko tzüngluruwa süitemer, ta

parnokisa ashi.

Nagaland state nütsüng yongsük teimbaleni ajuruba khuret atema sorkari mebilemstür. Foothill Road ya Nagaland nung mapa tejentiba rongnung ka lir aser iba lenmang nung gari senzütetsüsa meyanglura tawa Tsurangkong nung atalokba ama Assam nungeri timtem maneni agütsütsü aser rongsenketzüng mokdang ajurutsü, ta ta Tir Aotemsu Aier aser Tongti Tezulur S. Pangertoshi nati sangdong ka nung ashi.

## Niti Aayog-i Centre dang ICU yipden lakh 2 renemtsü ashir

**COVID WARA TASEMBUBA NUNG ANOGOSHIA NISUNG LAKH 4-5 DAK PUTETTSÜ AKOK**

**Guwahati, August 23, 2021**

**(Agencies):** Covid-19 wara tasembuba adoktsü akok ta bilemba nung ajemdaker Niti Aayog-i Centre sorkar dang ICU beds lakh 2 renemtsü tetuyuba agütsüogo.

"COVID-19 wara tasembuba adokra nisung 23% tashi mozü kidang amongtsüsa akümtsü" ta Niti Aayog head member VK Paul-i ashi.

"Taküm September ita India nung anogoshia nisung lakh 4-5 tashi dak coronavirus putettsü akok" ta VK Paul-isa ashi. Centre

sorkar indang COVID-19 task force nung pa mendenbuba lir.

Taküm April-June tsüingda COVID-19 wara tanabuba nung nisungtem mozü kidang amongba nung ajemdaker Niti Aayog-i sorkar dang ICU beds lakh 2 tashi renemtsü shiogo.

Niti Aayog-i Centre dang taruba ita tashi nung ICU beds lakh 2, ICU beds (ventilators) lakh 1.2, non-ICU hospital beds lakh 7 (lakh 5 nung oxygen-enabled) aser COVID isolation care beds lakh 10 renemtsü metetdaksü.

## August 31 tashi nung US sepaitem anientsüla: Taliban

**New Delhi, August 23, 2021 (Agencies):** August 31, 2021 tashi nung Afghanistan nungi US sepaitem anienba mapa metembangra timtem ajurutsü ta Taliban-i Hombarnü metetdaksü.

Mongulbarnü G7 lennirtem Kabul nung tensa indang jembitsü atema senden ka amentsü lia tanü Taliban-i iba osang sangoktsü

"US sepaitem anientsü atema August 31 ji tatembang lir" ta Taliban otongdar Suhail Shaheen-i ashi.

"US mesüra UK-i par sensotem anir aotsü atema mapang talila meshilokra, memelatsü. Iba anogo tashi nung nisungtem anienba mapa metembangra timtem ajurutsü" ta Suhail Shaheen-i ashi.

US aser UK dena bendang linük aikati pei pei senso meyirjang aika den Afghan nunger August 31 tashi nung anir aotsü atema mapa inyaker.

Iba dakji alia linük toktsür aotsü atema Afghan nungerm meyirjang aika Kabul airport nung adenshir aser iba ajanga nisung 20 tashi taküm samaogo.

US Federal Aviation Administration (FAA)-i Afghanistan nungi nisungtem anir arutsü atema domestic air carriers aser civilian pilots senzüttsü melaogo. Department of Defence nungi temelaba agir parnokki Kabul nungi nisung akokba tashi anir arutsü meranger.

Taoba hopta US President Joe

Biden-i osangbener den jembidang August 31 tashi nung US sepaitem anientsü atakzüka aliba anogo atsulangtsü akok ta shia liasü.

Mongulbar G7 senden nung British Prime Minister Boris Johnson-i Joe Biden dang August 31 sülena America sepaitem Afghanistan nung ayutsü atema asüingdangtsü akok.

UK-i US dang Afghanistan nung ano mapang talila alitsü atema shiogo ta Britain Foreign Office Minister James Cleverly-i osangbener dang ashi.

August 13 nungi UK sepaitem Afghanistan nungi nisung 4,000 jungnüa anir aruogo ta UK Ministry of Defence-i Deobarnü metetdakja liasü.

## COVID-19 Nagaland: 87 taneptsü angu, 33 dak putet

**Kohima, August 23, 2021 (TYO):** Hombarnü Nagaland nung COVID-19 puteta alir nisung 87 taneptsü angu aser 33 dak putet.

"Tesüiba ghonda 24 tsüingda COVID-19 puteta alir nisung 87 taneptsü nguogo. Parnokki Dimapur nung 25, Kohima o Zunheboto nung metsüasensem (23), Mokochung nung 12, Peren nung 3 aser Wokha nung 1 lir" ta Integrated Disease Surveillance Project atema State Nodal Officer Dr Nyanthung Kikon-i ashi.

Parnok züingsema taneptsü angur ajak agi nisung 27,238 kümogo aser ibaji 91.95% lir, ta paisa ashi.

"Tanü nisung 33 dak COVID-19 aliba putet. Parnokki Dimapur nung 15, Mokochung nung 8, Wokha nung 3, Kohima o Zunheboto nung anana (2) aser Peren, Phek o Tuensang nung kaka (1) lir. Parnok züingsema nisung ajak agi 29,622 kümogo, ta Dr Kikon-isa metetdaksü.

Tang Nagaland nung COVID-19 puteta anepalur nisung 916 lir, ta paisa ashi.

Nagaland nung COVID-19 alitsü akok ta temolung meleme bilemba sample 303,564 tendangogo. RT-PCR ajanga 105,677, TrueNat ajanga 73,482 aser Rapid Antigen Test ajanga 124,406 tendang, ta Dr Kikon-isa metetdaksü.

"Deobar tashi nung nisung 648,497 nem COVID-19 vaccine indang dose 830,293 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,848, healthcare workers 15,989, arishi küm 45 ser temapur 191,278 aser arishi küm 18 nungi 44 tsüingda alir 380,382 lir" ta paisa ashi.

Vaccine agirtem rongnungi nisung 181,796-i dose anaprong agiogo. Parnokki frontline workers 43,066, healthcare workers 12,832, arishi küm 45 ser temapur 111,255 aser arishi küm 18 nungi 44 tsüingda alir 14,643 lir, ta Dr Thurr-isa ashi.

## Tashidak aketba tanurtem nem mezüing vaccine agütsütsü: NTAGI

**New Delhi, August 23, 2021**

**(Agencies):** Tanurtem nem Covid vaccine agütsüadang temang nung tashidak aliba arishi küm 12 ser tema tanurtem nem mezüing agütsütsü ta National Immunization Technical Advisory Group (NTAGI)-i metetdaksü.

"Taoba hopta Zydus Cadila indang Zycov-D vaccine amshitsü temelaba agütsüogo aser iba ya tanurtem asoshi amshitsü. Ajisüaka, taintem nem vaccine agütsütsüba kanga tongtipang lir" ta NTAGI chairman NK Arora-i ashi.

Taküm September tatemlen mesüra October nungi Bharat Biotech-i tanurtem atema yangluba Covaxin temelaba

agütsü atema mapa tenzüksü. September nungi ita shia Covaxin dose core 10 shi yanglutsü tebilemba lir, ta Arora-isa ashi.

Taoba Hokolbarnü Drug Controller General of India (DCGI)-i Zydus Cadila-i yangluba COVID-19 DNA vaccine amshitsü temelaba agütsüogo. Dose asem indang vaccine ya taintem aser arishi küm 12 ser temapur tanur nem agütsütsü.

Zydus Cadila-i küm nung ZyCoV-D indang dose million 100 nungi 120 tashi yanglutsü sentong lir ta metetdaksüogo.

**COVID VACCINE TENDANGDANG SHILEM AGIR NEM CERTIFICATE AGÜTSÜTSÜ:**

India nung Serum Institute of India-i yangluba Covishield aser Bharat Biotech-i yangluba COVAXIN vaccine tem tendangba nung shilem agirtem nem digital COVID-19 vaccination certificates agütsütsü.

"Linük nung COVID-19 vaccine research & treatment nung shilem agiba atema tepela sayua certificates agütsütsü aser linüki parnok ajak dang pelar" ta Hombarnü Union Health Minister Mansukh Mandaviya-i ashi.

Vaccine tendangba nung shilem agirtemi Co-WIN Portal, Aarogya Setu, Digilocker mesüra UMANG Application ajanga certificates agizüktsü akok, ta paisa ashi.

## NHRC-i Centre, Assam aser Mizoram nem tetuyuba agütsü

**Guwahati, August 23, 2021**

**(Agencies):** Taküm July ita Assam aser Mizoram arrtsü atema mangatettep tulu adokba atema National Human Rights Commission (NHRC)-i Centre, Assam aser Mizoram sorkartem nem tetuyuba agütsüogo.

Assam-Mizoram arrtsülen meimchir temeten alema inyak, ta NHRC-i ashi.

Assam nungi Md Injamul Haque-i ken o benokba nung ajemdaker Deobarnü NHRC-i Union home secretary aser Assam o Mizoram chief secretary tem nem tetuyuba agütsü.

"Onoki iba tatalokba indang osang metetpelaogo aser tatalokba osang angashia temolung raksar. Ken o benokba nung sorkar mapa inyakertem

asüba aser yiruba indang shia lir" ta NHRC-i ashi.

"Iba tatalokba nung Human Rights alema inyakba ajiteter. Iba amala ken o ya Commission-i kanga süoki ia züingshir. Anungji hopta pezü tsüingda telangzüba agütsütsü mapang atakzüksür" ta NHRC-i Union home secretary aser Assam o Mizoram chief secretary tem dangi shidi zülü.

## WASU-i Career Guidance sentong ka ayongzüka agi



HSLC aser HSSLC tatidang nung takok angur nem tetushi agütsüba aser Career Guidance Seminar katsüba mapang WASU lenirtem den shisalen sayur aser kaketshirtem külemi tangokba noksa nung angur.

**Dimapur, Luroi/August 23 (TYO):** Western Angami Students' Union (WASU) ajanga August 21, 2021 nü Sechü Zubza Council Hall nung "Felicitation-cum-Career Guidance" sentong ka ayongzüka liasü.

Union ajanga sangdong ka nung ashiba agi, High School Leaving Certificate (HSLC) aser Higher Secondary School Leaving Certificate (HSSLC) examination 2021 nung takok angur nem tetushi agütsüba den külemi parnok tarutsü wadang asoshi lenmang sayua iba sentong ya ayongzüka liasü.

Iba sentong nung Rokono Keyho, Joint Director, Higher Education, Kohima aser Kuolacalie Seyie, CEO, Seyie Auto na shisalen sayur ama

arua shilem agia liasü.

Iba sentong mezüngbuba session nung Rokono Keyho ajanga New Education Policy (NEP 2020) aser education system nung temelenshi indang jembia liasü.

Vocational aser skill development nung temolung agütsütsü indang jembiba mapang pai kaketshirtem dang New Education Policy yagia item nungji rangloka lir, ta ashi.

Kuolachalie Seyie-i "Business potentialities in Nagaland" onük nung jembiba mapang kaketshirtem dang business ya career ka ama bilemstü ayongzüka aser Nagaland nung shishilempaba tsütsü lenmangtem lemsatepa liasü.

Takok angutsü atema meranga inyaksüla, bendanga

agütsütsüla, tezü danga malitsüla aser ochishia alitsüla, ta pai ashi. Paisa mapa bushir masü mapa agütsür ka akumtsüla aser tatok bushiba, zübazülemba aser azümesenba ajanga wadang ajak nung tamakok ajuru, ta shia liasü.

Iba sentong nung WASU tongti zülur, Mhiesisekho menden liasü aser tir Thekrusevi Meru-i sentong nung adener pela agizükba mapang kaketshir takok angur nema tenüngsang agüja liasü.

Iba sentong nung WASU kübok NBSE rank holder aser subject topper nem sempet balala agüja liasü.

Baptist Mission School Jotsoma nungi Adeno Gwirie nem 2021 WASU Award for excellence sempet agüja liasü.

## State Level Monitoring team pur Jalukie nung senden amen



Addl. Secy. Power, Mohammad A. Shihab, IAS lenisüba kübok Dy. Director H&FW, Dr. Thomas densema State Level Monitoring team on COVID-19 puri August 21, 2021 nü Peren district kübok Jalukie Sub-Division semdanga Sub-Divisional Task Force on COVID-19 züngsemtem, FBOs aser CSOs tem den senden ka ADC Office, Jalukie nung amenba noksa nung angur.

**Dimapur, Luroi/August 23 (TYO):** Addl. Secy. Power, Mohammad A. Shihab, IAS lenisüba kübok Dy. Director H&FW, Dr. Thomas densema State Level Monitoring team on COVID-19 puri August 21, 2021 nü Peren district kübok Jalukie Sub-Division semdanga Sub-Divisional Task Force on COVID-19 züngsemtem, FBOs aser CSOs tem den senden ka ADC Office, Jalukie nung mena liasü.

Iba senden ya ADC Jalukie aser SDTF Chairman, Dr. Tinojongshi Chang, NCS mendenpuba sür mena liasü.

Senden nung ADC Jalukie ajanga ketdangsürtem dang district nung coronavirus den raratsü asoshi renema aliba indang tongmelang agi rasaa ashi.

Paisa district nung COVID-19 mozü agiba tsütsü temolung süa renloka maoba indang sasa

ashi aser civil society aser tamangba yimsü dak ajemdaker tentetba lokti balalai shilem agia nungitba atema pelaba lemsatep aser maneni kasa tangatetba nung yariteptsü ajungshia liasü.

District nung tang COVID-19 jenjang, osettsüset, tendangba aser mozü agiba indang osangtem Dy. CMO, Dr. Lanuakum Jamir aser UIP/RCH, Dr. Kiholi nati senden nung lemsatep.

Mohammad A. Shihab, IAS ajanga senden nung jembiba mapang Jalukie SDTF aser medical nung inyakerkem lungjemer Sub-Division nung timtem balala ajuruaka COVID-19 den raraba asoshi tenüngsang agüja liasü.

Civil society, frontline worker, tamangba yimsü anung amendaker tentetba lokti balala aser union balalai district nung COVID-19 tensa ketdangsütsü asoshi yaritepba atema pai

pelaba lemsatep.

Asenok nuk agi COVID-19 wave ana tashi nguogo aser wave tasembuba ya mapang mashi nung tenzüksü akok, anungji ajak lungjemer Medical Department den yariteptsüla, ta Ali-isa ashi.

Mohammad A. Shihab-ia senden nung jembiba mapang, sorkari COVID-19 mozü agiba atema süoki ia bilemer, anungji Medical Department den yaritepa Sub-Division nung temsüa aliba nübür ajak mozü agidaksütsü merangtsüla, ta ashi.

Iba senden mamen tsüngta parnoki Ahthibung Sub-Divisional Task Force/Block Task Force den SDO (C) Office, Ahthibung nung sensaksem kaa liasü aser PHC Ahthibung, COVID Hospital Jalukie, CCC Jalukie aser PHC Heningkunglwa semdanga liasü.

## Wokha DTF puri state sorkar ketdangsürtem den senden amen

**Dimapur, Luroi/August 23 (TYO):** State sorkari shimteta ketdangsürtem rongnungi Commissions & Secretary, Excise and Sericulture, Orenpemo Kikon aser Joint Director, Health & Family Welfare, Dr. Chekroshuyi Tetso nung den Wokha District Task Force (DTF) on Covid-19 pur senden ka August 23, 2021 nü Deputy Commissioner, Wokha indang Conference Hall nung senden ka mena liasü.

Commissioner & Secretary, Excise and Sericulture, Orenpemo Kikon-i senden nung jembiba mapang, district ajak asoshi sorkari DTF pur yaritsü aser district o state sorkar na tsüngta apular ka ama inyaksütsü aser district balala nung COVID-19 tashidak anema raraba nung nungdakba tem jangjateta sorker nem metetdaksütsü asoshi senior officer kaka shimteta lir, ta shia liasü.

Wokha district nung tashidak wara azüoktsü asoshi maparen balala inyaka indang jembiba mapang, District-i tetenzük nungi tanü tashi mapa tajung jenti inyaka arur, kechiaser Wokha district ya Assam state den arütsüa lir, ta pai ashi.

Kikon-i ashiba agi, COVID-19 wave mezüngbuba mapang district nung nisung asüba tajemtiba liasü aser wave tanabuba nung nisung 500 dak tema asüba nungi shilem ishika vaccine dose mezüngbuba agir liasü aser nisung ka dose anaprong agir liasü, saka pa dak danga tashidak keta liasü.

Vaccine agiba ajanga nübürtem iba tashidak nungi kumzüker ta kuli ngutetogo, ta pai ashi.

"State nung COVID-19 wave tasembuba arutsü teimla lir, anungji asenoki ibaji nokdangtsü asoshi renema alitsüla, kechiaser wave tasembuba ya tanur aser talisa lanurtem asoshi lendong tulu

alitsü. Anungji itemji temolung nung pur state sorkari district ajak yaritsü asoshi supervisor board ka tentet," ta pai ashi.

District nung iba tashidak tendangba aser mozü agiba asendenshitsu nungdaker, ta pai ashi.

DTF den yaritepa tarutsü asoshi sentong balala yanglutsü, nübürtem nem awareness agütsütsü aser yimadak yimtsüngtem nung nübürtem nem mozü agitsü ajungmesotsü atema sentong balala yanglutsü atema onok arua lir, ta pai senden nung ashi.

Pai district nung lokti tentet balala dang nübürtem iba COVID-19 tashidak nungi kumzüka ayutsü asoshi tendangtsü aser mozü agitsü atema awareness agütsüba nung DTF yaritsüla, ta ayongzüka.

Joint Director, H&FW, Dr. Chekroshuyi Tetso-i state nung COVID-19 yimya indang onük nung ajemdaker jembiba mapang, wave tasembuba ya arura ita ishika tsüngta asenoki kechi tensa ajurutsüar memetet, ta ashi.

State nung iba tashidak wave mezüngbuba aser tanabuba mapang asürtem ya arishi küm 30 nungi 60 tsüngta liasü aser Wokha district kising nunga mezüng wave mapang nisung 70 aser tanabuba wave nung nisung 370 jungnüa asü, ta pai ashi.

Deputy CMO, Wokha Dr. Zuben Kikon ajanga senden nung district nung COVID-19 tensa indang lemsatepa liasü. Iba senden nung Chairman, DTF & DC, Wokha, Orenthung Lotha menden liasü.

Iba senden nung DTF züngsemtem, Chairman Lotha Hoho, Lotha Baptist Churches Association (LBCA) aser Lotha Catholic Churches Association nungi teshimtet nübüttem arua dena liasü.

## Tening nung morok kiya techanu ana kümzük



**Dimapur, Luroi/August 23 (TYO):** Tening yimtsüng nungi morok kiya techanu ana kümzüka August 21, 2021 nü Nagaland Zoological Park, Dimapur nem agütsüba asoshi EAC Tening, Tumben P Tsanglao-i anir district administration aser Namsibo, Forest Range Officer, Tening ajanga pelaba lemsatepa liasü.

Morok kiya techanu ana ya August 20, 2021 nü teburchanu pezüü ngua liasü. Par pezü ya Tening yimtsüng nungi arishi küm 11 aser 12 tsüngta Njanam, Kaisithui, Khoualung aser Wiramsiaged alitsü, aser parnok ya ayong nung temang shidoktsü aoba mapang ayong anasa süngpok ka nung morok kiya techanu ana ya tetsüi yutsür orr lia angu, ta ashi.

Parnoki morok kiya techanu ana ya yimdaki bener adokba sülen Tening yimdak Government High School

tesayur, Chamdinbo-i EAC dang item kiya ya tim ketdangsür nem amoktsütsü asoshi teyari asüngdanga liasü.

Iba sülen Nagaland Zoological Park, Dimapur aser DFO Peren nungi ketdangsürtemi takotet nübü nem kiya techanu ya anepaludaksütsü aser kümzüka ayutsü mechi Tening yimtsüng nungi Nagaland Zoological Park, Dimapur-i belentsü maparen balala inyaka liasü.

Tang tashi iba morok kiya techanu ana tetsü ya kong aliar memetet. Kiyi techanu ana ya arem min nung masü saka alu anasa nisung alidak ngutetba ajanga arem shiruru alitsü tesem ajema akumba sayur.

IUCN (International Union for Conservation of Nature) Red List status ajanga India nung anguba morok kiya ya anepalua kümzüka ayutsü nungdak, ta shia lir.

# Manipur nung Olympian ana nem sorkar mapa agütsüogo



**Imphal, August 23, 2021**

**(Agencies):** Manipur sorkari mapa agütsüta ta nangzükba ama Olympic nung hockey asayartem nem mapa agütsüogo.

Sorkari youth affairs & sports department nung Nilakanta Sharma nem deputy director aser Sushila Chanu Pukhrabam nem assistant director mapa agütsü.

Manipur minister Letpao Haokip, department ketdangsürtem aser parnok kinungertem lia

Olympians- Nilakanta Sharma aser Sushila Chanu nati mapa agizük.

"Hockey Olympians Nilakanta Sharma aser Sushila Chanu nati Minister Letpao Haokip tsungdang Department of Youth Affairs and Sports nung mapa inyaksü tenzükba atema pelar" ta Manipur chief minister N Biren Singh-i metetdaksü.

Shanglakpam Nilakanta Sharma ya Indian hockey team nungi asaya aser Tokyo Olympics nung bronze medal

angu.

Nilakanta Sharma ya Indian men's hockey team nung midfielder liasü.

Küm 41 sülen Team India-i Olympics nung bronze medal angu.

Tokyo Olympics nung Indian team-i Germany 5-4 koker bronze medal angu.

Tokyo Olympics nungsa Indian women hockey team-i Great Britain den bronze medal atema asayadang 3-4 agi tamakok angu aser Sushila-i midfielder asaya.

# Dibrugarh nung tezüngjang yokyayokjir ka apu

**Dibrugarh, August 23, 2021**

**(Agencies):** Assam kübok Dibrugarh district nung police-i tezüngjang yokyayokjir ka puogo.

Dibrugarh police-i Abhaypur tesem nung iba nisung apu.

Pa ya Lalmati Tinsukia Gaon nung alir Gautam Sonowal (Girin Sonowal) ta jangjaogo.

"Abhaypur tesem nung pa jenoka alidak nungi apu. Girin Sonowal aser Bipul Konwar nati küm aika Dibrugarh nung tezüngjang yokyayokjiba mapa inyaka arur. Tenati sensakertem dak tenük yok aser parnok indang tezüngjang ayoktsü mesüzük" ta Dibrugarh Additional superintendent of police Bitul Chetia-i ashi.

"Tenati tezüngjang alir dang nungi anguba sen teimba ayu aser tezüngjang tenlar nem sen tera dang agütsü" ta Chetia-isa ashi.

"Anogo ishika tejaklen iba ken o dak sendakba nung onoki Samar Paul ta ser nisung ka apu. Nisung kati par kinunger ka nem tezüngjang tenlatsü akok saka nisung kari dang sen yong mesüra tashiyim agi tezüngjang tenlara, ibaji ozüing alema inyakba mapa ka lir" ta Chetia-isa metetdaksü.

Tawa tu Assam kübok Dibrugarh district nung human organs mafia-i süngolu nung mapa inyakertem dak tenük yoka mapa inyakba osang ka temai adok.

Singlijan tea estate nungi Ramu Karmakar-i taküm April ita pa indang tezüngjang ka Rs 3.5 lakh yong yokdokba nangzük.

Iba atema bushisüngdanga arudang Gautam Sonowal (Girin)-i Ramu Karmakar'er kidangi orr pa dang tezüngjang yokdoktsü atema mesüzükba osang angazük.

# Mizoram: Covid-19 maliba tesem nung school lapoktsü melar

**Aizawl, August 23, 2021**

**(Agencies):** Aizawl Municipal Corporation (AMC) tesem adena orr Covid-19 maliba tesemtem nung academic session 2021-2022 atema school 300 dak tema lapoktsü melaogo.

Mizoram sorkar ajanga August 08, 2021 nü sangdongba Covid19 tetuyubatem nung AMC adena orr Covid-19 maliba tesemtem nung shishaliok rejutem tanaben lapoktsü asoshi temelaba agüja lir.

Covid19 tetuyuba tasen nung anidaka August 09, 2021 nü state school education department-i tetuyuba ka ajanga Deputy Commissioner dang asüngdangyar Covid-19 maliba jila aser yimtsüing tem nung primary nungi higher secondary level atema shisaliok rejutem lapoktsü asoshi temelaba agütsü.

Iba den külemi Department ajanga agütsüba Standard Operating Procedure (SOP) nung akangkanga anidaktsü shiogo.

"Academic session 2021-2022 atema Aizawl district

densema district tenet nung School 376 shi lapokshitsü melaogo" ta School education department director, James Lalrinchhana-isa ashi.

Ozüngi lapoktsü melaba school teimbaka nung class tenzükogo aser Khawzawl district nung school 27 shi Hombar nungi tenzükogo, ta paisa ashi.

School education department-i Covid-19 wara maliba tesemtem nung shishaliok rejutem jangjadar aser taruba anogo ishika tsüingda school teimba lapoktsü, ta Lalrinchhana-isa shisem.

Aizawl district nung school 49, Champhai district nung 151, Serchhip district nung 74, Lawngltai district nung 47, Siaha district nung 11, Saitual district nung 20 aser Khawzawl district nung school 27 lapokogo, ta paisa metetdaksü.

District 11 rongnung Lunglei, Kolasib, Mamit aser Hnahthial district temi 'Covid19-free village' indang list magütsü lir. Ibaji anguba

sülen ang shisaliok rejutem tanaben lapoktsü atema temelaba agütsüta akok, ta Lalrinchhana-isa ashi.

School lapoktsüba melaba tesem teimba yimdak-yimtsüing lir. Item tesem nung internet connectivity kanga majung anungji school lapokba ajanga kaketshirtem kanga ajangzüksü. Covid-19 aliba tesemtem nung online class maneni agidar, ta paisa shisem.

Yaküm den medemdangra Covid-19 wara ajanga academic session (2021-2022) tasenba ya ita kati menua liasü aser iba academic session May ita nungi ang tenzük.

Covid-19 wara ajanga yaküm March ita nungi tenzükba school aser tanga shisaliok rejutem ita 15 tashi shibangogo.

Yaküm küm November ita Covid-19 tashidak puteter ajema akümba asadangteta taküm January 22 nungi school tem lapoka liasü saka Covid-19 wara tanaben adokba ajanga April ita school tem tanaben shibang.

# Meghalaya police indang INSAS rifles ngutetogo



**Shillong, August 23, 2021**

**(Agencies):** August 15, 2021 nü Meghalaya Police indang INSAS rifle asem tashi police ket nungi longkak aitertermi rakzüka bener aoba ngutetogo.

Shillong kübok Umkhrah ayong nung mapang talangka bushiba sülen Meghalaya fire & emergency services department ketdangsürtemi rifle asem ngutet.

Mejangjaba nisung kati züluba shidi ka Shillong indang osangkaket nung adokba aser East Khasi Hills SP ajanga iba shidi agizükba nung ajemdaker rifle asem atema bushiteptsü

tenzüka liasü.

Prangpong asempronji Shillong nung Umkhrah ayong temdanga yanglur aliba Umpohliaw apu kübok lia angu.

Iba shidi ya tain kati züluba ama bilemer aser shidi nungji pa (tezülur) aser medemertemi lanur ket nungi item rifle meshizük aser ayong nung indok ta shia liasü.

"Lanurtemi prangpong ya tim mestü amshitsü nungbo ta onoki arentaka bilem. Iba jagi parnok ket nungi prangpongtem meshizük aser Umkhrah ayong nung indok" shidi nungsa shia liasü.

# Karimganj nung prangpong shibelenba maparen makdok

**Guwahati, August 23, 2021**

**(Agencies):** Assam kübok Karimganj district nung prangpong shibelenba maparen ka makdokogo.

Hombarnü Assam police aser Border Security Force (BSF) telok kati iba mapa inyakba puteta liasü.

Badarpur Bazaar area nung parnoki pistol pezü aser pen pistol ka ngutet. Iba dak sendakba nung nisung ana apu.

"Badarpur PS aser BSF külem telok kati Badarpur Bazaar tesem nung nisung ana ket nungi pistol 4 aser pen pistol ka ngutetogo. Pistol tem



tangar keti maodang mapang shitak nung puogo" ta Kokrajhar Police-i metetdaksü.



Hombarnü All Assam Students' Union (AASU) züngsemtemi Dibrugarh nung aliba Brahmaputra Cracker and Polymer Limited (BCPL) jakdang mener lungkak aitba angur. 1979 nungi 1985 tashi Bangladesh nungi ozüing alema arurtem anema mapa inyakdang AASU züngsem 855 asüba bilemteta BCPL campus nung Martyr's Park ka yanglutsü akhangba den tanga onüktem atema parnoki lungkak ait. (Dibrugarh, August 23)



## TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 24, 2021

### Ni kü vote mayoktsü !

**T**anü atema iba yimobilem zülutsü bilema alidang, medemer kati kü dangi Whatsapp nung Clean Election yimyim tajung ka yok. Iba jagi kü mulungjang nung kanga kongshi, ibayongji iba yimyim jagi iba yimobilem ya tenzüker. "Tanü asüng sü ka jenjang sen lakh ana, jang ka jenjang sen meyrirjang 70, nashi ka jenjang sen meyrirjang 50, ak ka jenjang sen meyrirjang 30,000, nabong ka jenjang sen meyrirjang 20, azü ka jenjang sen meyrirjang ter, ak chanu ka jenjang sen 5000 aser an ka jenjang sen 500 meshir, anungji nai election mapang nü vote sen yong yokra, nai koba shiruru jenjang den kasasa sen meshia ali, iba shiruru nenaji jenjang kasasa asütsü. Sü ka sen lakh ana yong ayokba o an ka sen 500 yong ayokba naji kasasa, tayokji tayok, naji talisanger alar kumogo. Anungji talisangi chinüa achitsü, khu bendaktsünüra bendaktsütsü aser sendak yunüra sendaka ayutsü. "Asenok asoshi tanü atema Clean election osangji aji lir. Iba osang ya zünger, asenokbo khen asenoksasa asenoka koba shiruru jenjang nung aliar medemdangdi. Election ya asenok asoshi vote ayokba mapang ka ama kumadok nungji, joko asenok rongnung nisung aika kibong mesüa taküm lia aotsü mapa kecha meinyak ser election lu ayimer kumadokogo. Iba jagi kibong mainer, pei temanga shitak malir aser chirnute taküm raksadaktsür. Aji oda, joko tang amai election mapang anasai arudang, item election lu ayimertem jagi senotsü akar nisung election-i aitsü ajungshia jajatsü, kechiyong takarsangji election-i ira pa ket nung akaba rongsen ajakji parnok meyong asütsü. Item nisungtemji yimten lenir amai jembia jajatsü saka parnok sülen anidaker shinga mali, par tsürabur, chirnur aser kinunger ajak sen agi alidaktsütsü. Aji oda, kar nashi alang, kar ak alang aser karbo nabong alang aser karbo ak chanu aser an alang ta pei pei yari pei jenjang atakteta ayoktsü. Atangji, tarutsü nükla aser shisa tasen ka lemsateptsü masü saka tayoker asünungji takar atemabo election nung adoktsü kanga temela. Ajisüaka, takarsang atemajia election nung sen aika endoka adokbaji tatembang masü aser angati alemer a masü, pai vote alibaji vote ayokertem nem aputsür amai bilema agütsür, anungji adoker külen vote ayokertem nem teyari agütsütsü aser parnok asoshi terenlok mapa inyaktsütsü government-i agütsüba sen nungi pai election nung vote aliba sen menoker. Ibayongji, terenlok mapa meinyak ser sen agizüka agiyonga aser government mapatem sen agi ayokyonga, nübortemi ola madoker aser "paa election nung sen aika endokerji, kecha masüar agidakjang," ta nübortemiang nübortem sen agizüka agitsü yimli agütsür. Ibaji asen lima lir. Joko, asenok taküm ya shiruru taküm den kasasa tangar dang jenjang atakteta ayokba taaktsü sobaliba yabo endoktsüla. Iba jagi taoba hopta nung asenoki iba osangkaket nung, "Clean election takok angutsü atema voter shia dangi "ni vote mayoktsü," ta sign südaktsüyonga signature campaign ka ao nunga koma süla ?" ta asüba nung shisalemsatepogo. Atangji, telangzür aikati joko asen nübortem dak temulung melemtetba indang shisalemsatepogo. Tang election mapang tonga marudangbo ajaki nangzüksüa akok saka kodang election tonga arudir, tangarjibo yutsür arogo nung tenzükertemi dena election nung sen agir aser tangar vote a alia jajar. Nagaland nungbo reverend-ia dena proxy vote agütsüba otsü lir. Iba jagi Clean election sentong ya mapa bolua mejajaang tajungba ta nisung karibo shiogo. Atangji, asenoki election mapang nungbo nisung masü saka dokan nung oset ama mesüra kiset shiruru taküm ka amadang bilema sen yong aser mapa yong ayokba agi tezüdangteper. Ajisüaka, iba ama tebilemstü aliba agiang Clean election sentong maneni tesem ajaklen agiyonga aotsü nungdakba indang jembir. Asenokbo Election ya Clean masü tashi Clean election atema meranga inyakdi. Election maparen ya kenü anogobosa merüktetsü aser shitak election timi agia nübör aser Tsüngrem meimba yimsüsürtem ochishia shimtetsü.

## OLEMSABANG

### Arogo-i aser Laishiri yamai clean election nung shilem agidaktsüner

Ms. Esther (Osang zülur)

(Yashi adok nungi...)

**CEC Achaayangba bangdak tamendakdak kar alitsü nundaker aser itemji yamai asütsü akok:**

- Arogo Mungdang ajanga iba CEC bangdak tentetsü.
- Iba bangdak-i political parties aser stakeholders ajak den sensaksema/consultation agia election related ground rules and regulations latetsü aser ajak asoshi election tokteptsü atema kasa inyakyim lateta yutsütsü (create a level playing ground for all candidates and parties without any partiality or preference).
- CEC bangdak-i political parties ajak den equi-distance maintain asütsü aser shinga anema mesüra support süa meinyaktsü aser mejembitsü (The clean election campaign must not support or voice out against any party).
- CEC bangdakji principle-grounded initiative ka asütsü - election nung tashiyim aser sen amshiba anema noktakba people's movement ka asütsü (Rejection of violence, threat, identity-politics and inducement).
- CEC-ji Democracy tongshi 'honest and fair election' (ochi aser liromedem election) Naga lima nung meraketa akangakanga tentetdaksütsü merangba bangdak ka asütsü. Linük senso (citizen) shirnoksa election nung shilem agitsü temsüa ali (voter mesüra candidate ama) parnok ajak kecha tetsübu aser tenokdangba mali-i pei shisa tajung amshia (through informed personal choice) shilem agitetsübaji CEC nükjidong asütsüla.

**Arogo tenzükertem, Laishirtem ano temulunger kija shiai item ya nangzüktem nungbo kanga ajungtsü:**

- i. Party aser candidate ajak matsüngdang kasa litetba,
- ii. Election dak sentakba nung shinga nungia teyari kecha magizüksü,
- iii. Tenoktangba liaka-meliaka kü meyong vote-bo nisa agütsütsü,
- iv. Ochi aser tesünep nung election agitsü atema nungdakba nübu tenlatsü,
- v. Ochi aser tesünep nung election agitsü atema teti sarasademtsü,
- vi. Item teinyaktsü temulungtetba sayua küm ka jilia par kima nisan temesüng songa ayutsü.

Polling day-nü mesüra matongdang kongsa tashiyim mapatem adokdir Arogo nung lenirtemi aser Laishirtemi par kima songa aliba nisan temesüngji atsüteta bener timtem adokdak tesem jagi oa, Lai zünga, ken tena sarasadema aser sayutsüngia jajadaktsüner.

Party worker-tem mesüra supporter-tem matsüngdang parnok tim masüba mapatem anema Arogo aser Laishirtemi lokti aser kijaia mapang nung pei tamang sayuteta Yisu Khrista tenüng nung tasü ita ola adokdaktsüner.

ABAM-i Aoe candidate ajak jar mensem akadang candidate shia nem yamai nangzükdaktsütsüla: Ni election nung takok angutsü atema Tsüngremi mulungba dang inyaktsü, anungji ni:

- i. kü opposition candidate(s) anema tim mesüi meinyaktsü,
- ii. yi mamshitsü
- iii. sen mamshitsü aser
- iv. injang, bomb mamshitsü.

Iba kübok candidate aser party tenüng zülur sign südaktsütsüla.

Kodang election campaign tatsükba tatsükba kümdir aser petsaprong tenzükdir, Arogo tenzükertem aser Laishirtemi yimtung süa procession aotsü. Iba mapang nung placard aser slogan item mesükba "Yimden yimsürji Tsüngremi dang shimteter," "Tsüngrem tsübuba lenir dang shimtsüla", "Tsüngrem atakatem tsübudi" ta asüba amalatem amshitsü akok.

Election Commission anema, alima temzüng ozüngi melaba anema inyakbatemji tuteta sayutsüba Arogo aser Laishirtemi mapaji asütsüla. Kokra 2022 tetenzüklen Ao Arogotem nung ABAMi anir Election dak sendakba sentep ka dang masü, saka Sermon Series asemben-pezüben sentep nung amangbapur nem tangatetba agütsütsü asoshi sendong atonga agitsübaji tongtibang lir.

Tanü Election koda junga, merüka agitetsü iba indang jembir. Aji saka Arogoi iba kija dak rangloker mapa inyakra ajibo kodanga tabensa masütsü. Anogo shia tamanger ka libaliruba nung ochi, temerük, jakla, yimya yimpong, asüngteta litetba, tatishitsü taküm khuli sayutetba tamanger ayaktem mali tashi tebilemstü lir. Sannükertemi aser Tsüngrem tenzükertemi pei santem mesütsü nungloktsüba mamatsüla, santem tenüng teta metetsüla, santem kong samadar metetsüla. Nütsüng nübör dang Tsüngrem O teratet sayutsüla. Aser züzüa sarasadem mesüi masü saka tenela nung nüksü yima prokang. Arogo ta asüba nung ajak dena lir. Tamangertem tamakok asoshi asenok ajaki sarasadema bilemdanger tajungtiba inyaktsü Tsüngrem nungi tangatetba shisatsü meshidi.

Clean Election Campaignji asenok Aortemi Naga nunger lenmang tasen kati anir aotsü maongkatulu ka asen madang Tsüngremi yutsüa lir ama bilemer. Küm 150 tejaklen asen kin-i tamangba aser shisaliok lenmang tasen mesemteta tasüita Naga kin ajak anir apusoba ama tanü asen jakdang iba kasa lenisüba mapa election wadang nung inyaktsü anungdaka lir. ABAM 150th anniversary 2022 küm amongtsü aser 2023 küm State Assembly election agitsü - iba electionji Mokochung district nung Clean Election principle nung agitetra koda tesüngmangtsü aser jangratemtsü ka asütsü!

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## World Evangelical Alliance tentetba sülen küm 175 jungogo



World Evangelical Alliance senden nung tangokba noksa nung angur.

**August 23, 2021:** 1846 küm London nung World Evangelical Alliance (WEA) mezüng tentetba sülen Hokolbarnü (August 20, 2021) küm 175 ajungba anogomong mongogo.

Küm 175 tejaklen denomination 52 aser linük 11 nungi Evangelical lenir 800 shi adenshia London nung WEA tenteta liasü.

Arogo aser denomination balala nungi Khristantem ajak longjema alitsü atema WEA tenteta liasü, aser tanübo WEA nung linük 143 aser Khristan nütsüng million 600 shi lir.

WEA-i alima nung mission mapa kanga keraa inyakba den külemi Evangelical Khristan tangatetba nung ajemdaker loktiliba nung tongtibang onük aika atema inyaka arudar.

WEA-i alima nung tamangba yimsü ajak sadoka amangtsü atema inyakba den külemi tanurtem alar tia nung ayuba anema inyaker aser meimchir temeden atema inyaker.

Tesüiba küm 10 tsüngda WEA-i United Nations den

senteper inyaker aser UN Economic & Social Council nunga WEA nem Special Consultative Status agütsüogo.

WEA küm 175 ajungba nungtem nung WEA-i temeja website ka ajanga parnoki inyaka aruba osangtem lemsateptsü aser tarutsü nung inyaksü mangdang lemsateptsü.

WEA Secretary General, Dr Thomas Schirrmacher-i, "WEA nung denomination temeyoktep aika lir aser evangelicals ka küma longjema lir. 1846 küm Protestant nungi aika longjema liasü: Reformation mapang nungi tenzüka Anglicans, Lutherans, Reformed aser Anabaptists aden, iba sülen Baptists, Methodists aser Salvation Army aden, aser tanübo Aso 20buba nung tenzüka Arogo tasen aika densema lir, item rongnung Pentecostals, Charismatics aser Independents densema lir," ta metetdaksü.

"National Evangelical Alliance aser regional Alliance shia puti otsü balala lir, aser

evangelical Khristantemji kin telok balala nungi aser oshi 1,000 jembirtem densema lir. Tang iba Jubilee mong nung onoki itemji asadanga pelar," ta paisa metetdaksü.

"Global network ka ama WEA ya Arogotem nung tera yanga lir aser onok maneni Yisu Khrista tiyongtsü südaktsüba den temzüngji Laishiba südaktsütsü aser osangtajung prokba ajanga alima nung temelenshi adokdaksütsü atema inyaksü," ta paisa shisem.

WEA taküm küm 175 ajungba nungtem nung social media campaign tenzüka anogo shia sarasadem onük balala lemsateptsü.

Dr Schirrmacher-i alima nung evangelical Khristantem dang iba Jubilee mong nungtem nung sarasadem nung ka küma longjemtsü ayongzük.

"Sarasadem ya WEA tamendakdak lir, anungji onoki iba Jubilee tenzüka alima nung Khrista temang ka asütsü aser maangka balala agia tayongzükba balala atema inyaksü," ta pai ashi.

## Afghanistan nung Taliban-i Khristan ka teküp shia reshikangshi

**August 23, 2021:** US nung taoba mapang Congress züngsem, Mark Walker-i, Afghanistan nung Taliban teloki Khristan ka teküp shia reshikangshia tepsetba sülen tongshi ka nung tuloker ayu, ta metetdaksü.

America nung radio host, Todd Starnes den interview ka nung jembidang Mark Walker-i tang Afghanistan nung aliba Khristantem atema tebilemstü akaba lemsatep.

Afghanistan nung pastor temi pei nisungtem yaritsü meranger saka shisabulur, ta ashi.

Mark-i, "Tetsübu mesüra aoksa olong ya ni mamshiner, ajisüaka tang ama tensa ka

nung meimchir taküm jenjang indang jembidang item orenji amshitsüsa akümer," ta ashi.

Tang Afghanistan nung tensa kanga mejungi kümogo, ta shia Mark Walker-i, "Khristan kibong ka den tesendaktep aliba nisung ka teküp shia reshikangshir tongshi ka nung songa ayuba densema osang balala angashir," ta metetdaksü.

Mark Walker-i, "Iba tatalokba ya Mongolbarnü (August 17) liasü. Khristan kibong kati Khristan yimsü toktsütsü memelung, anungji parnoki par kinünger ka teküp shia reshikangshir tongshi ka nung songa ayu," ta metetdaksü.

Nai iba osang ya komaser metet, ta asüngdangba langzüdang Mark Walker-i, "Ni iba osang tejangja lemsateptsü makok, ajisüaka tang tashi yangji (Afghanistan) inyakertem ajanga kü nem iba osang metetdaksü," ta ashi.

Taliban teloki taoba sorkar pusemertem aser America nung den külemi inyaksemertem anema meinyaksü, ta sangdonga liasü ajisüaka parnoki kibong shia tua taoba sorkar pusemertem mita oa apur, ta osang angashir.

Afghanistan nungsa Taliban teloki German public broadcaster indang reporter, Deutsche Welle'er kinünger ka tepsetba osang pai metetdaksü.

## ANOGO ABEN TSÜNGREM DEN

### Khrista mesükba yimya

"Nenek temeimba chirtem amato nenoki Tsüngremji jilu ajizükang." Ef. 5:1

Tenyar Pauli züluba shiti (I Kor. 11:1, Efesa 5:1) nung pai kechi koda Khrista koda Khrista jilu yamaji nenoki kü jilu ajiang ta amangbapur dang ashiba angur.

Shidi süra Pauli Kibuba Yisu Khrista alima nung taküm aliba mapang munguakasa kodang pa Temeshi Tanelai apu, iba ain tashi ajanga pai Yisu Khrista takum koda liasü item ajak anguba ama kümdaktsü aser iba tangatetba Tanela jagi pa mesepdaktsüyong pai kecha terata makai pai kechi koda Khrista jilu ajir, yamaji Khrista dak amanger shiai Pa jilu ajia aliba jagi Yisu sentsüwangshidaktsütsü asoshi tayongzükba tulu agütsü. Tanü kati ka nungi jilu ajizüktepba ya nisungtem asoshi yimya (Fashion) tereprangtsü ka kümogo; kechiba ta süra nisung ka nungi kati, alinük kati ka nungi libaliru, inyaksangshi, sobusolemstü yimyatem beshitsü angazüka item jilu itepba agi sünga lir. Au kar nungibo asenoki tajangzük angur, saka ajak nungibo masü.

Adianutem, alima yimya jilutem koba ajanga kotaker senmang samatsür, item nungjagi jenbua alitsü tangatetba moajang ta anogoshi sarasadema jajadi.

### SARASADEM

Oh! Tsüngrem ne chir Khrista jilu ajizüka beshir ka ni kümdakjang ta mepishir. Amen

## Franklin Graham-i Afghanistan atema sarasademtsü ayongzük

**August 23, 2021:** Nungtugu nisung ka danga mesüra sayutsünger, asür Billy organization ka danga mali. Iba Graham'er jabaso, Franklin tensa nungi Tsüngremi dang Graham-i US sepaitem kümzüktsü akok," ta Afghanistan nungi agienba metetdaksü.

2020 küm US Tir election arudar, aser pai Khristantem mapang nunga Franklin Graham-i Lincoln Memorial dang Afghanistan nungter atema sarasademjang, ta mepishia sarasadema jajaba sentong ka ayongzüka liasü.

International Christian relief & evangelism organization-Samaritan's Purse nung CEO aser Tir, Franklin Graham-i, tang Afghanistan tensa ya kanga majung, ta metetdaksü.

Billy Graham Evangelistic Association nung Tir, Graham-i, "Tsüngremi sayatenya mapa meinyakra item nisungtemi lendong majurui iba linük nungjagi ajentsübo teimla mali, anungji asenoki parnok atema sarasademtsütsü nungdak," ta ashi.

Franklin Graham'er jabaso tanubosang, Edward-a Samaritan's Purse nung inyaker, aser taoba mapang pai Afghanistan nung U.S. Army Special Operations Forces nunga küm trok tenzüko.

Edward Graham-i, "Ni yangji (Afghanistan) küm aika liogo aser iba mapang nungji kü tembar aika süogo. Ni meimba Afghan nungter aika lir. Iba ya nisungi sayangtetba lendong ka lir, aser iba lendong aziöktsüsa

2020 küm US Tir election mapang nunga Franklin Graham-i Lincoln Memorial nungi U.S. Capitol tashi sarasadema jajaba sentong ka ayongzüka liasü.

Franklin Graham-i mapang shia White House semdang aser pa ya taoba Tir, Donald Trump atema-a adviser inyakogo. US sepaitem tesüiba küm 20 tashi Afghanistan nung aliba sülen tang Tir tasenbai sepaitem anitetba atema pai Tir aija arudar.

August 16 nü pai Facebook post ka ajanga, "Nenokia Tir Trump menungrar asü? Nibo menungrar," ta lemsatepogo.

Paisa Joe Biden-i Afghan nungter aser bendangertem, talisa Khristantem iba linük nungjagi anitettsü atema asalentong junga meyanglu, ta aitsür.

"Iba linük nung azü tokshibaji Biden/Harris administration ajanga asütsü. Iba dak alia tangbo tanga linüktemi America dak melung alemtsü asü? Asen tsükchirtemi asenok menütsüdar. Tsüngremi United States of America dang taochi sayuangma," ta paisa shisem.

**OLONG PAITEP # 5915**

	1		2						3
4					5		6		
7									
			8						9
10								11	
							12		
13								14	
15									

**TIPILEN**

- 1. Taochi sayuba - 10
- 4. Temezüng agi kongshi - 4
- 5. Ainer - 6
- 7. Chiyungnü - 3
- 8. Mi nung atsük - 5
- 11. Asen masü - 3
- 13. Lenmang ajurutepdak - 6
- 14. Yangi masü - 4
- 15. \_\_\_\_\_ jang - 6

**LANGTSÜNGLEN**

- 1. Menungra - 6
- 2. Mi tsükloker mesepeba - 4
- 3. Süngo o tzü ajemba - 5
- 5. Temenemsü tajung - 7
- 6. Idak - 4
- 8. \_\_\_\_\_ ok - 4
- 9. Tebangi apuba kongki tapu ka - 6
- 10. Tashi endokba metet - 5
- 12. Tzü manung senzüba - 4

**OLONG PAITEP # 5914 TELANGZÜBA**

**TIPILEN :**

- 1. Rebeka, 4. Adam, 6. Yohan,
- 9. Zü, 12. Sayutsüngir, 15. Ku,
- 16. Naman, 17. Abel, 18. Samuel.

**LANGTSÜNGLEN :**

- 2. Kan, 3. IM, 5. Anüng, 7. Amsü,
- 8. Yosep, 10. Sara, 11. Isak, 13. Yakob,
- 14. Nana, 16. Noa, 17. Am.



**ALOKBAR KIBONG KONDOKOL :**

Warakla tenu serious shirangba agi anogo asemnü atema tenur aliba towni oa yariteper shilangdang kinungpu Alokba office i or lia ki atong dang techir Polokbai report asür.

- Polokba** : Oja Oja, na malidang ya na, yashibo aunty Rosela asen kidangi arur obala tenaji asen yipdeni ayaketa tuagi...
- Warakla** : Ojang dang shia liang tepu, nübu arurdang tanüngbaji shiang no.
- Polokba** : Haija Oja.  
(Nikongdang Alokba office nungi shilanger külen)
- Warakla** : Saalaa, ana ojang dang alitsü, tanüsa bendangtsü, Talak, nai shitur anenbato tatongi shiangjung.
- Polokba** : Oja na, na tanutsür kidangi or to aunty Rosela aruagi obala tena asen yipdeni tur, yaküm obala malidang uncle John nüna amato talangka mejanga kazü ati-i.
- Warakla** : Ojanga Tambu! Anaprong parabarji ajeebar sülaba!
- Alokba** : Ok, no problem!

Lilir : WhatsApp

**TANÜBO NAI LANGZÜANG**

Q. Koba küm 'SKOCH Award' tenzük?

- A. 2000      B. 2003      C. 2006      D. 2009

----- (Taruba adok nung onoki langzüksü)

**YASHI ADOK TELANGZÜBA : 1976**

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Kosük**

(v) süng süktang mesüra kotang ( break off of wood )  
\* Oboula meyong mechi **kosük**.

**Kota**

(n) tezü nung atangba süngjang, iba yagi tzü tateter. (bottle gourd)  
\* Tzü tatettsü kota amshia aruba agi tzü tatetba oset dang **kota** ta ajar.

**NAI-A YA METETTER MA?**

**ALIMA NUNG JENJANG TULU AKETBA TROPHY KAR:**

- 1. FIFA World Cup Trophy - \$20 million (Football)
- 2. Woodlawn Vase Trophy - \$2.5 million (Horse Riding)
- 3. Borg-Warner Trophy - \$1.3 million (Motorsport)
- 4. BNP Paribas Fortis Diamond Games trophy - \$1.3 million (tennis)
- 5. Stanley Cup Trophy - \$650,000 (Ice Hockey)
- 6. Ballon d'Or trophy - \$600,000 (Football)
- 7. America's Cup trophy - \$250,000 (Sailing)
- 8. Africa Cup of Nations trophy - \$150,000 (Football)
- 9. DFB-Pokal trophy - \$108,000 (Football)
- 10. Serie A trophy - \$66,000 (Football)
- 11. Bundesliga trophy (Meisterschale) - \$54,000
- 12. The Super Bowl Trophy (Vince Lombardi Trophy) - \$50,000
- 13. ICC Cricket World Cup Trophy - \$30,000
- 14. Commissioner's Trophy (MLB) - \$19,309
- 15. European Championship Trophy (Henri Delaunay Trophy) - \$15,000
- 16. European Championship (UCL) Trophy - \$15,000
- 17. Larry O'Brien Championship Trophy (NBA trophy) - \$13,500

**SUDOKU # 5956**

**TELANGZUBA # 5957**

1			6		8			9	4	8	2	7	6	1	3	5	
					2	3			7	5	1	4	3	9	6	2	8
	7	5			4				2	6	3	5	8	1	7	9	4
			9	4		5			8	9	6	7	4	3	5	1	2
5		2		3		9			1	2	5	9	6	8	4	7	3
9	4	6	1	2		3	8		3	7	4	1	5	2	8	6	9
				7	9	6	8	4	4	3	7	6	9	5	2	8	1
7			8			5	3		5	8	2	3	1	7	9	4	6
						9	1		6	1	9	8	2	4	3	5	7

**OJANG LUTEP # 5501**

- OSPÜI :
- ÜTSK :
- YNGO :
- TEANCHU :
- DOYOKKBA :
- UNGR :
- ORTPEI :
- SSAAA :
- ILBEM :
- AAM :

**OJANG LUTEP TELANGZÜBA # 5500**

**ASENI INYAKTSÜ MOLUNGTETBA MAPA KA MEINYAKI DANG YUTSÜTSÜ KANGA TASAK**

**TAN HOPTA ATEMA - KOMA SÜLA ?**

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?

# Delhi nung Afghan refugee temi UNHCR office kima longkak ait



August 23, 2021 nü New Delhi nung Afghanistan nunger refugee temi United Nations High Commissioner for Refugees (UNHCR) office kima adenshir takhangba balala agüja longkak aitba noksa nung angur.

**New Delhi, August 23 (Agencies):** Hombarnü Delhi nung UNHCR office kima Afghanistan nunger refugee temi Afghan nunger tanga linüktemi oa maongka tajungba bushitsü atema UN Refugee agency-i pusemba shidi agüjang, ta takhangba agüja longkak aitogo.

Delhi aser anasa aliba yimitem nungi Afghan nunger noklang aika United Nations High Commissioner for Refugees (UNHCR) office kima adenshia longkak ait.

Afghan nunger refugee temi, 'Onoki tarutsü teimla aginer', 'Onoki ochi temeden aginer', 'Joko ola madoki malitsü' ta yimiyim ayim liasü. Ano karibo 'UN Geneva, Afghan Refugee tem yariang' aser 'Afghan nunger refugee ajak nem resident visa agüjang' ta ozülü amer liasü.

Longkak aitba sentong ya Afghan Solidarity Committee (ASC)-i ayongzük aser longkak

aitertemi anepdang nungi tenzüka nikongdang tashi yimiyim ayima liasü. ASC lenirtemisa parnoki anogo anasem tashi maneni longkak aittsü, ta metetdaksüogo.

Afghan nunger refugee temji Lajpat Nagar, Bhogal, Noida, Greater Noida, Faridabad aser tanga yimitem nungi adenshia liasü.

Iba committee nung tongti lenir, Ahmad Zia Ghani-i, tang India nung Afghanistan nunger 21,000 shi lir aser iba nungjagi nisung 7,000 ket nung dang kuli kaket tejangja mali mesüra cards lir, ta metetdaksü.

Osangbener den jembidang pai, "India nung Afghan nunger janratema malir, aser maongka tajung mangur. Onok 'third country' kati oa yangji onok aser ozü chirnurtem atema tarutsü tia tajungba bushitsü atema onok dak temeden mali asü. Onoki mepishiba UNHCR-i agizüksüla aser pusemba shidi agütsüsüla," ta metetdaksü.

ASC volunteeer teburtemi yimiyim ayim aser tetsür den tanurtemi Afghan nunger 'Sarzamine Mann' ken tena liasü.

Longkak aiter rongnung arrshi küm 19, Mariam Arzo Nooyar-i, "Ozü Afghanistan linük Taliban-i rakzükogo," ta ashi. La aser lar kibong küm tenet tejaklen Kabul nungi India-i arua liasü.

Longkak aiter rongnung Kayenat Yusufi-i, "Onoki Afghanistan-i meyipa moutettsü, anungji onoki maongka tajungba bushitsüla, ajisüaka tia maka India nung onoki maongka mangur. Ni doctor ka kümner saka yangi temaba shisaliok atema kü ket nung documents mali," ta ashi.

UN Refugee Agency-UNHCR ya alima nung meimchirtem kümzüksü, temeden kümzüksü aser refugee tem tia tajungba kümtsüsü atema inyakba organisation ka lir.

# Afghanistan tensa dak sendakba nung party ajak senden amentsü

**New Delhi, Luroi/August 23 (Agencies):** Afghanistan tensa dak sendakba nung August 26, 2021 nü Centre sorkari party balala nungi parliament floor lenirtem senden ka ayongzükogo, ta Hombarnü Parliamentary Affairs Minister-i metetdaksü.

August 26, 2021 nü anügang 11:00 ako nung Main Committee Room, Parliament House Annexe nung party ajak

senden amentsü.

Minister of Parliamentary Affairs, Pralhad Joshi-i twitter ajanga, "August 26, 2021 nü anügang 11:00 ako nungi Main Committee Room, PHA, New Delhi nung External Affairs Minister, Dr S Jaishankar-i Parliament nung party balala nungi floor lenirtem nem Afghanistan tensa osang metetdaksütsü. Email ajanga lenirtem jaokogo anungji

tejaokertem ajak adentsü mepishir," ta metetdaksü.

Ato kilonser, Narendra Modi-i Ministry of External Affairs dang party balala nungi lenirtem dang Afghanistan tensa osang metetdakang, ta tuyua liasü.

Kasa senden nungsa Afghanistan nungi bendangertem densema India nunger anir aruba mission atema jembiba den Afghanistan tensa asadangtsü.

# EC-i Bengal nung by election atema anogo sangdongtsüla: Mamata

**Kolkata, Luroi/August 23 (Agencies):** West Bengal nung coronavirus tensa junga azüoktetogo, ta shia Hombarnü West Bengal chief minister, Mamata Banerjee-i Election Commission dang state nung assembly menden tenet atema by election agitsü asoshi tekaraba nung anogo sangdongtsüla, ta ashi.

Trinamool Congress tongti, Mamata-isa, nüburtem indang democratic temeden magientsü atema Election Commission-i inyaksüla, ta ashi.

"Election tembangba sülen ita pezü jungogo, aser tang coronavirus wara kanga junga azüoktetogo aser vote agütsüsü atema nüburtem dak temeden lir. Parnoki (ECI) yimtenren party tem dang tebilemba

asügangogogo," ta ashi. "EC-i tekaraba nung by election agitsü atema anogotem sangdongtsüla, kechiyong asenoki nüburtem democratic temeden magientsüla," ta lai ashi.

West Bengal nung assembly constituency tenet nung by election agitsü, aser item mendenji Jangipur, Samshergunj, Khardha, Bhabanipur, Dinahata, Shantipur aser Goshaba lir.

Taoba assembly election nung Mamata-i Nandigram menden nung BJP candidate, Suwendu Adhikari matsügang tamakok ngua liasü. Taruba by election nungbo Mamata-i Bhabanipur assembly menden nungi ang tokteptsü, ta osang angazüker.



Bengaluru, August 23, 2021: Hombarnungi tenzüka Karnataka nung class 9 nungi class 12 pur tem school tanaben lapokba anogo nung Chief Minister Basavaraj Bommai-i Bengaluru nung aliba school ka nung kaketshirtem den jembiba noksa nung angur.

# Coronavirus wave tasembuba agi tanurtema kongshitsü akok

**New Delhi, August 23 (Agencies):** Home Ministry panel kati Prime Minister's Office (PMO) dang, October ita nung coronavirus wave tasembuba tenzüksüa akok, ta metetdaksüogo.

Home Ministry-i National Institute of Disaster Management (NIDM) kübok mongintemi akümba committee ji tenteta liasü. Parnokisa, coronavirus wave tasembuba ajanga tanurtem-a kongshitsü aser taintem dak kongshiba ama kasa kongshitsü, ta metetdaksü.

Committee-isa, iba ama tensa kaji azüoktsü atema linük tesem ajungalen tanurtem atema paediatric facilities peria mali, anungji medical infrastructure aser healthcare facilities tashi itshitsüla, ta metetdaksü.

PMO nem agütsüba report nungji committee-i linük nung medical facilities peria maliba, doctor aser staff peria maliba, ventilators aser ambulances peria maliba osang metetdaksü.

"Tanur aika dak iba tashidak menara parnok anepalutsü atema medical facilities peria mali," ta mongin committee-isa metetdaksü.

"Third Wave Preparedness: Children Vulnerability and Recovery" report nungji covid tasembuba wave ajanga tanurtem kongshitsü ta

metetdaksüba den iba wara anema raratsü atema renema alitsü asoshi asalentong balala metetdakja lir.

Parnokisa comorbidities keta alir tanurtem aser matamabensar tanurtem nem corvid vaccine agütsüsü atema shia lir.

Wara nokdangtsü atema mera balala agia inyakyonga October ita tatembanglen coronavirus wave tasembuba tenzüksüa akok, ta parnoki metetdaksü.

Ano tanga osang ka nung, tesüiba ghonda 24 tsüngda India nung ano nisung 25,072 dak coronavirus putetogo aser iba tashidak agi shiranger 389 süogo, ta Hombarnü Union Health Ministry-i metetdaksü.

Tang tashi nung India nung nisung 32,449,306 dak coronavirus putetogo aser iba tashidak agi shiranga asür 43,4756 jungogo.

Tang linük nung coronavirus agi teshirangdakpur 3,33,924 dang kümogo, aser ibaji coronavirus caseload nungi shilem 1.03 dang lir.

Indian Council of Medical Research-i, tang tashi nung India nung samples ajak senteper 50,75,51,399 tendangogo aser iba nungi August 22, 2021 nü samples 12,95,160 tendangba densema lir, ta metetdaksü.



Port Blair, August 23, 2021: 1971 küm rara nung India nungeri Pakistan madak takok anguba sülen küm 50 ajungba nungtem nung Hombarnü Port Blair nung Andaman & Nicobar Command sepaitemi linük wako asongba noksa nung angur.

## Kabul airport nung bendanger sepai densemakhatap



U.S. Marine Corps ajanga agütsüba noksa ka nung U.S. Marines aser Norwegian coalition forces temi Afghanistan yimtiba, Kabul nung aliba Hamid Karzai International Airport nung sepaitem den yaritepa Evacuation Control Checkpoint nung linük yutsür aotsüpur achayangba angur.

**Kabul, Luroi/August 23 (Agencies):** Hombarnü Kabul airport nung Afghan nung tanüker temi mejangjaba nisungtem den khatapba mapang anüolen sepaitema densema khatapa liasü, ta Germany indang mitkartemi ashi.

US-i aniba sepaitem ita tatem tashinung Afghanistan yutsür aotsü nükjiding lir, aser August 15, 2021 nü Taliban sepaitemi Kabul agiba sülen Afghan aser bendanger meyirijang aika tayimsü nungi linük yutsür aotsü teimla nung airport bushia arur.

Airport nung rongrong adokdak nisung 20 süogo, aser parnok ya timba khasetba aser ajemsetba alitsü, kong US aser linük balalau pei nübür aser

lendong mela ajurutsü aliba Afghan nungertem iba linük nungi anizüker aotsü meranger. Hombarnü khatapba mapang nisung ka asü.

Airport tezülen nungi sniper kati Afghan nung tanüker dak north gate anasa injang khaloktsü, ta osang ajanga ashir. Taoba mapang Afghan sorkar meyong sepai inyaka alir nisung 600 shi airport nung US sepaitem yarir.

Khatapba nung US aser German sepaitem dena liasü, ta Germany mitkartemi ashi. Afghan nung tanüker asem yiru aser parnok airport nung aliba field hospital ka nung yaria liasü, ta ashi.

Injang khaloktsüba sülen tensa aziüka lir, ta NATO ketdangsur anati airport nungi ashi.

Airport tezülen Taliban teloki par sepaitem yoka lir, kong parnoki totuyuba kar inyakba nung yariteptsü meranger.

Bendanger sepaitem Afghanistan nungi ainshitsü mapang tonga arudang Afghan nung nisung tenet gate balala nung ajemsetba sülen airport nung Deobarnü Taliban züngsemtemi nisung kar dak züka merenshi.

2001 küm September 11 nü US amakba sülen US sepaitemi al-Qaeda lenirtem aser parnok atsükokdaksür, Taliban merenshitsü asoshi amak tenzüker küm 20 sülen United States aser par tembar linüktem indang sepaitem Afghanistan yutsür ao tenzüker hopta ka majungdang Taliban teloki iba linük nung sorkar atsüngdok.

## Iran-i Afghanistan nung telok ajak dang azütokshi anentsü ayongzük

**Tehran, Luroi/August 23 (Agencies):** Iran foreign ministry-i Hombarnü Afghanistan nung telok ajak dang azütokshi anentsü ayongzükba den Tehran-i Kabul nung lokti tentet ajak longjemer kümetba sorkar ka amenoktsü busemer, ta ashi.

Taliban-i Afghanistan yimtiba August 15 nü atsüngdok. US sepaitemi linük toktsür aoba aser Afghan army chirepba maongka agia parnoki linük yimtiba atsünga liasü.

"Afghanistan nung lokti aser political party ajaki tashiyim mamshitsü aser sensaksem ajanga tejkadangi aotsü atema inyakteptsüla," ta ministry otongdar Saeed Khatibzadeh-i Tehran nung osangbenertem den sensaksemba mapang ashi.

Iran-i Afghanistan nung political party ajak den tongtepratepa arudar aser yimjung nung tashi melentepa, ajak longjemer tentetba sorkar ka amenoktsü pusemer, ta pai ashiba den iba mepetmesü ya military ajanga mebentettetsü, ta shisem.

Khatibzadeh-i sa, bendanger sepaitemi linük toktsür aoba maongka agia iba amala sorkar ka amenokba ajanga Afghanistan süngjemshitsü aser renloka aotsü Iran-i imlaa atar, ta ashi.

Ken o asadangertertemi ashiba agi, Taliban tejkadangi aoba ajanga kidanger Iran jenjang mejungi kümogo, saka Shiite Islamic republic yagi Sunni teloktem asüngsashiba dak sendakba nung inyakyim dak ajemdaker ken o

asadangdar.

1996 nungi 2001 küm tsüngda Taliban-i Afghanistan yimsü asüba mapang Iran aser Taliban a tsüngda mepetmesü adoka liasü. Tehran-i parnok yimsüsüba magizük.

Iba sülen Taliban pur ya America-i aniba teloki atsüngtok.

Iran-i ita tsüngda Afghanistan nung tarutsü ken o bentettsü atema Taliban yaa shilem ka kümdaktsüsüla ta shia arudar.

Kasa mapang nung Khatibzadeh-i ashiba agi, Pakistan indang foreign minister Shah Mahmood Qureshi-i Brehostibarnü Tehran semdangtsü aser linük ana tsüngda tesendaktep atema aser talisa Afghanistan indang onük benoka sensak asemtsü.

## New Zealand nung Covid-19 Lockdown atsülangshir

**Wellington, Luroi/August 23 (Agencies):** Ato Kilonser Jacinda Ardern-i Hombarnü New Zealand nung COVID-19 lockdown atsülangshitsüogo aser ashiba agi, Delta variant agi animesoba coronavirus wara ya tangang tetenzüker lir.

Level 4 national lockdown ya anogo asem nü atsülangtsüogo aser August 27 nü ayaterem tashi benoktsü. Kasa mapang nung wara poktetdak yimti Auckland nungbo tenokdangbatem August 31 nü tashi benoka atatsü.

"Tang ajak asoshi tajungtibaji tenokdangba ano mapang tatsüka atsülangshiba ya asütsü. Alima-i asenok dang langka kar danga sayur lira aji iba COVID-19 variant ya züba züba magitsüba asütsü," ta Ardern-i osangbenertem den sensaksemba mapang ashi.

Ardern-i ashiba agi, linük ajunga nung coronavirus Delta variant agi nübürtem dak kongshiba metetdakja arudar. Wara poktetdak tesem 320 dak tema lir aser tashidak menar alirtem den ajuruteper alir 13,000 mangaoka lir, koba taoba mapang dang nungi kanga agi timba lir, ta laisa shisem.

"Delta variant ajanga inyakyim ajak melenshitsüogo," ta Ardern-i ashi.

New Zealand nung Hombarnü nisung 35 dak COVID-19 tashidak potetogo aser tang tashi nung ajak senteper nisung 107 dak tashidak poteta lir. Health ministry sangdong ka ajanga ashiba agi, tashidak potetertem rongnung Auckland nungi 33 aser linük yimtiba Wellington nungi ana densema lir.

## Tennessee nung ajungben tzümetsüng adok, nisung 22 asü

**Nashville, Luroi/August 23 (Agencies):** US kübok Tennessee state nung ajungbena tzümetsüng adoka nisung 22 asü aser ano ter dak tema samar bushir.

Nashville anüolen tsütsü Humphreys County nung nisung 50 dak tema samar bushiba mapang lir.

Otsü yanglutsüsa tzümetsüng ya Deobarnü nungi tenzüka lenmang ajunga mubang aser telephone aser power line tem laodaktsü.

Iba tzümetsüng agi tamajungtiba kongshir alidak emergency worker temi ki ka nungi ki ka sema samar aliba nisungtem bushir aser ano kari tzü agi metsüngzüka aoba ki jana nunga bushir.

Samar aliba nisungtem tenüng ya Humphreys County nung aliba emergency centre nung bendena lir, aser kinungertem shisabulua lir.

Iba county indang Facebook page nung nübürtemi pei kinunger aser medemertem angutsü meranga osang agitepa liasü.

Samar alirtem ya timba Waverly jila nungi lir. Tennessee state Governor Bill Lee-i iba tesem ya Deobarnü semdang liasü.

"Nisung takum samaba aser ki-o-jen raksaba ya onsara lir. Tennessee nung temolung teraksa nung alirtem den ozü sarasadem dena lir," ta pai ashi.

Humphreys County nung nisung meyirijang aika power mali kumogo aser kakat reju ka nung reunification centre ka amenoka lir. Timtem ajurua alir yaritsü atema nübürtem dang osettsüset tenlatsü osang sangdonga lir.

Honibarnü ghonda 24 majungdang Humphreys County nung tzünglu ya inch 17 (43cm) arua Tennessee nung anogo ka nung aruba otsü melenshitsü.

North-eastern US nung Storm Henri ajanga tzünglu tesashi bener aruja aliba mapang iba lendong ya ataloker alitsü.

Deobarnü menur Rhode Island nung iba yipru yagi kongshiba sülen ki 120,000 dak tema nung power mali kumogo.

Long Island aser southern New England nung nisung million aika dang tzükum nung tzü tali akumtsü, tzümetsüng adoktsü, süngdong aser power line tem laotsü, ta tekumdagtsü shiogo.

Tir Joe Biden-i Rhode Island, Connecticut aser New York state tem nung teyari agütsütsü melaogo, kong yipru tesashi yagi kanga mejungi kongshitsü imlar.

State kübok Hudson River Valley aser Catskill Mountains tesemtem nung tzümetsüng adoktsü akok, ta New York Governor Andrew Cuomo-i shisabulua ashi.

## 'Sweet Girl' sequel yanglutsü imlar: Isabela



**Luroi/August 23, 2021 (Agencies):** Isabela Merced-i la indang action film tasen - 'Sweet Girl' nung stunt tsütsü jangratema shilem agiba sülen, iba film sequel ka yanglutsü asoshi lai tejangraba lemsatepogo.

Arishi küm 20 tain actress Isabela-i iba film nung Jason Momoa den külemi shilem agiogo aser iba film nung stunt tsütsü '87eleven' (stunt team) den lai jangratema inyakba lemsatepa liasü. Iba film Brian Andrew Mendoza-i direct süa liasü, koba pa indang mezüng film asütsü.

ComingSoon.net den jembiba mapang, Isabela-i

"Rara (action) adenba film nung ni shilem agia aruogo. Iba project kanga tajung liasü, kechiyong iba film nung 'action scene' jenti lir aser teti nunga ni action movie' tem sapua aru," ta ashi.

"Iba stunt team dang '87eleven' ta ajar aser ni sapuba action movie tem nung parnoki inyakogo. Ajasünung, 'Atomic Blonde' nung Charlize Theron-i shilem agiba yimdangi arua, ni iba film nung inyakogo. Iba project jangratemsüka liasü," ta Isabela-i ashi.

"Transformers: The Last Knight' nung tongti shilem agir Isabela-i, "Ashiko, iba film (Sweet Girl) sequel ka

yanglutsü akok aser action shilem atema otsü tasen ka adoktsü imlaa atar. Ajisüaka, iba sequel yakta yangludaktsüner aser kasa stunt team den külemi inyakner, kechiyong parnok dak tasa balala aser shilem agirtem saksalemdaktsütsüsa, iba stunt team-i maparen junga anepalur. 87eleven den inyakba ama, ni kodanga iba amala stunt inyakdanga mali," ta shisem.

Iba film - Sweet Girl nung Ray Cooper (Jason Momoa) aser par jala Rachel (Isabela Merced) nati Amanda (Ray kinungsü) atema mangayangba otsü ka lir aser Jason-ia iba project nung pelaa inyakba lemsatepogo.

## September 10 nü 'Thalaivii' sayatsü



**Mumbai, Luroi/August 23, 2021 (Agencies):** Bollywood star Kangana Ranaut-i tongti shilem agiba film - 'Thalaivii', koba Tamil Nadu indang taoba mapang Chief Minister aser taoba actress asür, J. Jayalalithaa taküm otsü nung ajemdaker yangluba film ka lir, September 10, 2021 nü iba film theatre nung sayatsü terenemba lir.

"Thalaivii' film ya Hindi, Tamil aser Telugu oshi nung sayatsü, ta Hombarnü Kangana-i Instagram sabang nung film noksa ka den külemi iba osang lemsatepa liasü.

"Nüngtugu nübu ka indang

otsü ya screen tulu nung reprangtsü kanga dang tetemsü! Cinema tsütsü superstar ka ama agizüksü asoshi #Thalaivii atema lenmang lapoktsüdi. Lai (Jayalalithaa) iba wadang (cinema) nung inyakba bilemtetdi! September 10 nü Thalaivii sayatsü," ta Kangana-i lemsatep.

"Thalaivii' ajanga la (Jayalalithaa) taküm otsü sayatsü aser kodanga mamatetsüsa iba maparen nung tajangshiba tajung nguogo. Linük tesem ajunga nung theatre tem lapokyonga aor asünung, silver screen nung

fans dang la taküm otsü sayatsü asoshi onok yongyaseter," ta Producer Vishnu Vardhan Induri-i ashi.

"Jayalalithaa-i cinema tsütsü shilem tajung agiba ajaki jangjaa lir aser iba wadang asoshi la nübu tetemjen ka liasü. Lennir tajung ka bilemteta aser la nem akhüm tetushi agütsütsü asoshi, screen ajanga la taküm otsü sayatsü asoshi onoki lemtet," ta Induri-i shisem.

Asür, Jayalalithaa taküm otsü nung ajemdaker yangluba film - 'Thalaivii' ajanga lai taküm nung ajangshia arubatem sayatsü, kong la aiwa mapang Tamil cinema tsütsü actor tongti ka akümba den Tamil Nadu yimtenren tsütsü temelenshi adokdaktsütsüsa lai lennir tajung ka ama inyakba otsü tem angutsü.

Vibri Motion pictures, Karma Media Entertainment aser Zee Studios den Gothic Entertainment aser Sprint film longjemer 'Thalaivii' film sayatsü.

Vishnu Vardhan Induri aser Shailesh R. Singh na den Hitesh Thakkar aser Thirumal Reddy nungeri iba film produce süogo. Kasa mapang, iba project atema Brinda Prasad-i creative producer ama yariogo.

## AR-i Zubza nung sentong ka ayongzük

**Dimapur, Luroi/August 23, 2021 (TYO):** Hombarnü, HQ IGAR (North) kübok Ghaspani Battalion - Assam Rifles-i "Today's Youth Tomorrow's Future" omen nung ajemdaker Talent Hunt sentong ka ayonga agiogo,

Iba Talent Hunt shilem ama, painting aser kenten tetoktepba ayongzük, kong Zubza nungi kaketshir 20 agi shilem agia liasü.

Covid-19 dak sendakba tekümdangtsü meratem talisa 'social distancing' nung anidaka iba sentong agiogo. Iba sentong takok ngua ayongzükba atema Zubza nung alirtemi Assam Rifles dang pelaba metetdaktsü aser takok angurtem nem sempet agütsüogo.

Kasa anogo, HQ IGAR (North) kübok Khonsa Battalion - Assam Rifles-i Khonsa, Tirap District (Arunachal Pradesh) nung Rajas, GBs aser yimer 100 den telongjem senden ka ayonga agia liasü.

Lisopur den tesendaktep tajungba yanglutsü aser Assam Rifles indang sentong balala nübur nem angatetdaktsütsü nükjidong yur iba senden ayongzük.

Iba senden agiba mapang, Tirap tesem nung security tensa indang lisopur dang metetdaktsü aser telungpurtemi ozüng alema inyakba talisa tashiyim amshia rakzükkraktemba aser nisung pur aoba maparen nokdangtsü/ajemdaktsütsü asoshi security forces aser nübur amalitepa alitsü indang tongtibangtem metetdaktsü.

Iba dak alaka, BADP, Op Sadbhavna aser AR CAP ajanga Assam Rifles-i terenlok atema project balala inyakbatem yimertem dang metetdakja liasü. Senden nung adener yimertemi telangzüba tajung agütsü aser Tirap tesem nung yimji-yimjung alitsü asoshi Assam Rifles den amalitepa inyaktsü asoshi nangzüka liasü.

## 'Freddy' nung Alaya F aser Kartik na longjemtsü



**Mumbai, Luroi/August 23, 2021 (Agencies):** Bollywood actress Alaya F-i 'Freddy' nung actor Kartik Aaryan den külemi tongti shilem agitsü terenemba lir, koba Alaya sapurtem atema osang tajung asütsü.

Social media sabang nung, Alaya-i la indang noksa ka den iba osang jangjatsüba mapang, "Freddy! atema renema lir, team tajung ka den külemi inyaktsü maongka anguba asoshi pelar," ta Alaya-i clapperboard ka amer tangokba noksa ka den külemi iba olen lemsatep.

Kartik Aaryan-ia Instagram nung Alaya indang noksa ka lemsatep, kong noksa nung Alaya-i cake ka arangba sayur. Freddy nung @alayaf pelashishia agizüker."

Industry nung ajemoka, 2020 küm, Alaya F-i Saif Ali Khan aser Tabu den külemi 'Jawaani Jaaneman' film nung shilem agiogo. Iba film nung lai shilem tajung agiba atema, Best Female Debut' category nung lai Filmfare Award angu.

August 1, 2021 nü Mumbai nung 'Freddy' film tangok tenzükogo. Iba maparen dak sendakba nung, Kartik Aaryan-

i set nung tangokba noksatem lemsatepa liasü.

Taoba mapang, Ekta Kapoor ajanga senotsü tsütsü nungita aser Shashanka Ghosh-i direct asütsü aliba film - Freddy nung Kartik Aaryan aniokba osang sangdonga liasü.

Iba project indang jembiba mapang, Aaryan-i, "Actor ka ama, entertainment tsütsü maparen balala metettsü asoshi jangrar aser Freddy nung, tajangshiba tasen ka angutsü asoshi imlaa atar," ta ashi.

2018 küm sayaba 'Veere Di Wedding' Freddy' nung külemi inyakba sülen, Ekta aser Shashanka na film tanabuba atema longjemer asütsü.

Maneni, Freddy dak alaka, tawa Kartik-i project tulu ana - Sajid Nadiadwala indang musical love story' film ka aser Hansal Mehta indang 'Captain India' nung shilem agitsü aliba osang sangoktsüogo. Ano, Kartik indang film - Dhamaka ya OTT sabang ajanga sayatsü terenemba lir. Iba sülen, Bhool Bhulaiyaa 2 nunga pai shilem agitsü renemdar aser iba film yakta tangok tenzüktsü.

## Alexander Zverev-i Cincinnati Masters kokogo



**Luroi/August 23, 2021** (Agencies): Germany nunger asayar Alexander Zverev-i Deobarnü Mason, Ohio nung Western & Southern Open final nung Russia nunger asayar Andrey Rublev 6-2, 6-3 agi kokogo. Asayartem rongnung jenjang 5buba nung alisang Zverev-i iba takok densema asayamung 17 aser ATP Masters 1000 level asayamung pongububa koktetogo.

Tokyo Olympics tebur kija asaya nung gold medal anguba sülen Zverev-i tang iba asayamung kokogo. Pai taoba mapang Cincinnati-area nung asaya ka danga koka mali.

"Anogo pezü tejkadang Bodhbarnü iba court nung ni mezüngbuba asaya akok aser tang idaki mezüngbuba tite koktetogo," ta Zverev-i ashi. "Hopta tepeyong kanga jangradema asayaogo. Asayamung ka koker U.S.

Open nung asayatsü jngradema bilemer," ta paisa ashi.

Zverev-i first-serve points 28 nungi 26 akok aser break points 10 nungi pongu tashi kokteta liasü. Iba season tatembangbuba Grand Slam metenzük tsüingda pa tang asaya 11 nung khen danga tamakok mongui asayaa arudar.

Asaya nung Rublev-ia kanga meranga asaya aser double fault ka danga memenai aces 11 ao. Rublev, asayartem rongnung jenjang 7buba nung lir aser pai tang tashi nung ATP Masters 1000 tite ka danga kokteta mali.

Asaya mezüngbuba set nung Zverev-i game mezüngbuba aser tasembuba nung Rublev indang serve break asü aser pa 4-0 agi tejkadang aküm. Game pongububa nung Rublev-i Zverev nem mezüngbuba set-point maongka magütsütsü

atema meranga asaya aser point 40-40 aküm ajisüaka Zverev-i point ana atonga ngua mezüngbuba set akok. Tanabuba set nunga pai Rublev indang serve break süa asaya tenzük aser tetsükdaksü aika majurui asaya akok.

"Ni asaya akokba sülen kangabo mepela kechiyong Andrey-i koma bilema alitsü aji ni metata liasü, kechiyong küna küm 11 asüba mapang nung chichiba tembar lir. Pa Masters 1000 mezüngbuba akoktsü merangdar ta ni meteta lir aser pai yakta koktetsü," ta Zverev-i ashi.

Zverev-i asaya nung aces trok ao aser double faults pezü menaa liasü.

Season tetenzüklen Zverev-i Madrid aser Acapulco asayamung kokogo aser iba sülen Tokyo nung gold medal nguogo, kong pai Novak Djokovic tsükdakja liasü.

## Bengaluru FC aser FC Goa na Durand Cup nung asayatsü

**Luroi/August 23, 2021** (Agencies): Indian Super League (ISL) team pongu aser I-League team asem ta Durand Cup Football Tournament nung asayatsü. Iba asayamung nung team ajak agi 16-i shilem agitsü.

Iba asayamung ya Kolkata nung September 5 nungi October 3 nü tashi asayatsü. Iba asayamung ya taküm agi 130benbuba asayatsü, koba Delhi nung asayaa aliba 2019 küm nungi Kolkata nung asayadaki.

Durand Cup ya Armed Forces tenüing nung Indian Army-i ayongzükä asayar. Iba asayamung ya alima nung asayamung tejentiba rongnung tasembuba aser Asia nung football asayamung tejentiba

lir. Takümbo asayamung ayongertem rongnung West Bengal sorkara densemogo, shirnoki lenla ajak nung teyari agüja arudar.

ISL club FC Goa aser Bengaluru FC den ano Kerala Blasters, Jamshedpur FC aser Hyderabad FC nungeria iba asayamung nung shilem agitsü.

Parnok den tokteptsüpurtem rongnung küm 100 tain Mohammedan Sporting, Kolkata, I-League defending champions Gokulam Kerala aser Delhi nungi Sudeva FC nunger densema lir.

FC Bengaluru United aser Delhi FC na Indian football second division tenüing nungi asayatsü aser kasa mapang

nung Indian Army team (Red aser Green) ana, Indian Air Force aser Indian Navy, CRPF aser Assam Rifles nungi team kaka round-off 16 nung asayatsü.

130buba Durand Cup ya Vivekananda Yuva Bharati Krirangan (VYBK) aser Kolkata Mohun Bagan Club Ground aser Kalyani Municipal Stadium Ground nung asayatsü, kong küm ishika national level football asayatem ayongzükä asayaa arudar.

Durand Cup ya tanga asayamung dang nungi balaka, kong takok marok asem agütsür. Durand Cup aser Shimla Trophy ya belentepyonga aoer aser President's Cup teti atema agütsür.

## Indian Basketball Team FIBA Asia Cup atema qualify süogo

**Luroi/August 23, 2021** tasembuba jenjang nung (Agencies): Deobarnü FIBA tembang.

Asia Cup Qualifying tournament nung Saudi Arabia-i 96-72 agi Palestine akokba sülen India team finals atema qualify süogo, koba Jakarta nung 2022 küm July ita asayatsü.

Hokolbarnü mezüngbuba asaya nung India team-i 80-61 agi Saudi Arabia team makok saka Honibarnü Palestine team 79-77 agi akok aser parnok final atema qualify asütsü asoshi Saudi Arabia-i Palestine akoktsüla mesera Saudi team kanga mejungi tamakok angutsü nüngdaka liasü.

Saudi team-i Deobarnü asaya ayong ayonga akok aser asaya anaprongla akokba sülen parnok temaba jenjang nung tembang aser India team-i asaya ka koka tanabuba jenjang nung tembanga liasü. Palestine team-i asaya ka danga mekoki

India aser Saudi Arabia na FIBA Asia Cup finals atema qualify süogo aser team 13 den longjemogo. Final atema qualify asüba team tem rongnung Indonesia, Australia, Bahrain, China, Iran, Japan, Jordan, Kazakhstan, South Korea, Lebanon, New Zealand, Philippines, aser Syria densema lir. Final asoshi team 16 ya Chinese Taipei aser Guam na tsüingda asayaba sülen jangjatsü.

Qualifiers mezüngbuba round nung India team Group D nung Lebanon aser Bahrain na sülen tasembuba jenjang nung tembang aser qualifying tanabuba shilem tongteta liasü. 1993 küm dak alaker India team-i 1976 nungi tang tashi Asia Cup atema qualify süa arudar. Tang tashi nung India team-i 1975 küm dang jenjang pezüngbuba tongteta asayaa lir.

## Nice aser Marseille na asaya tembanga masayatet



**Luroi/August 23, 2021** (Agencies): Ligue 1 nung Deobarnü Nice aser Olympique Marseille na tsüingda asaya tembanga masayateti anen. Asaya tanabuba shilem nung Marseille nungi asayartem aser asaya reprangrtem tsüingda mangatettep adokba sülen asaya tembanga masayatet.

Marseille forward Dimitri Payet-i corner ka metsütsü lia Nice pusemertemi pa dak tzü bottle agi aon aser Payet-i meyiper fan tem dak bottle ka mereploksüba sülen fan tem kar ground telungi ait aser mepetmesü tulu adok.

Iba sülen team anaprongla ground toktsür ao aser asaya ghonda ka shi anena ataba sülen

Nice tir Jean-Pierre Rivere-i Nice pusemertem dang süngjemshitsü atema mepeshia metetdaksü. Iba sülen home team asayartem ground telungi aita warm up asü, ajisüaka Marseille team-i meyipa adoktsü memulungi liasü.

French daily L'Equipe sangdong ka ajanga ashiba agi, asayartem aser fan tem tsüingda raratepba mapang Marseille nungi asayar Matteo Guendouzi aser Luan Peres na yirua liasü.

Asaya tenzükler minute 75buba nung asaya manen tsüingda Nice puri goal ka idaktsür liasü. Parnok rongnungi Swedish striker Kasper Dolberg-i minute 49buba nung goal ka idaktsü.

### **BILEMDANGANG**

**"Tamagitsü o aika jembiba dang nungibo tagitsü o ka jembi tajungba."**